

Meta y informacion di Fundacion Respeta Bida



ORANJESTAD - Metanan di “FUNDACION RESPETA BIDA...semper corda!” ta basa riba articulo 1.1 di Constitucion di pais Aruba bou di Capitulo I: Derechonan basico: Art. 1.1 “Mester trata tur hende cu ta na Aruba igual den casonan igual.

No ta permiti discriminacion pa motibo di religion, filosofia di bida, tendencia politico, rasa, sexo, color, idioma, descendencia nacional of social, ta pertenece na un minoria nacional, propiedad, nacimiento, ni ningun otro motibo.”

E Fundacion ta aspira pa salvaguardia derechonan di cada miembro di e sociedad Arubano y promove libertad y igualdad di cada ciudadano, sea cu nan a nace na Aruba of no.

Nos mester keda alerta pa evita tur clase di discriminacion.

E Fundacion kier fomenta consciencia cerca e muchanan Arubano y e comunidad den su totalidad, encuan to e necesidad di solidaridat, tolerancia y aceptacion mutuo entre tur miembro di nos sociedad.

Directiva di e Fundacion ta como lo siguiente:

Presidente: Sra. Diana Pieters-Gonzalez

Vice-Presidente: Sr. José Fernandes Perna

Secretario: Sra. Martha Lichtenstein

2º Secretario: Sr. Frank Williams

Tesorero: Sra. Shereen de Cuba

E prome proyecto di e Fundacion lo ta: pone un estatua pa Anne Frank den e parke dilanti di Juliana School. Anne Frank ta representa e imagen simbolico cu ta corda humanidad cu un Holocausto

por sosode atrobe na cualke parti di mundo si hende no sa con ta coexisti pacificamente, respetando derechonan humano, libertad y igualdad di hende a pesar di tur diferencia entre ciudadanonan.

E diario di Anne Frank, originalmente skirbi na Hulandes, a wordo traduci den mas cu 70 idioma. Na aña 2000 a traduci e diario di Anne Frank pa di prome biaha na Papiamentu y a public’e bou di e nomber “E Cas Patras’.

Sra. Mary Wever-Lacle, e tempo ey ministro di Enseñansa y Labor di gobierno di Aruba, a skirbi e siguiente citaat den su prologo di e buki: “Ta mi speranza cu e publicacion di e Diario di Anne Frank lo contribui tambe na fortifica y aumenta e tolerancia pa diferencianan entre hende den nos comunidad.”

Drs. Stanley Lamp, e tempo ey ministro di Enseñansa, Cultura, Hubentud y Asuntonan di Deporte di gobierno di Antias, a skirbi den su prologo e siguiente citaat: “Ohalá e (Diario di Anne Frank) kontribui además na siña nos apresiá libertad i demokrasia i siña nos tambe balorá e diversidat den tradishon i kulturanan di humanidat.”

Pa e pueblo en general haya mas

conocemento di e Fundacion y su metanan, directiva lo haci diferente bishita di cortesia na diferente instancia den nos comunidad. Nos ta conta cu reaccionnan positivo ya cu e intencion principal ta pa hunto nos forma un Aruba tolerante y armonioso.

E Fundacion a inicia cu su campaña pa recauda fondo y ta envolve institucionnan, empresanan, banconan y personanan individual. Nos kier declara enfaticamente cu, aunke cu e Fundacion por conta cu completo apoyo di Gobierno, e fondonan pa financia e estatua di Anne

Frank y tur otro proyecto di e Fundacion lo bini completamente y solamente di contribucion di hendenan priva y empresanan.

Bo contribucion ta necesario pa por realisa tur e proyectonan di nos Fundacion. Nos ta conta cu bo generosidad y bo reaccion positivo. Di antemano nos ta gradici pa bo contribucion cu ta masha hopi aprecia. Number di inscripcion di e Fundacion na Camara di Comercio: S1167, Cuenta di banco acc. # 61128406 na CMB, e-mail adres: respetabida@gmail.com y numbernan di telefon: 594-1886 y 592-6659.